

Gremionan ta haya cu Gobierno y Parlamento no por negligisha Air Aruba

ORANJESTAD(AAN) For di Camara di Comercio, DIARIO a haya un comunicado den cual gremionan ta hala atencion di gobierno y Parlamento, pa bin cu un solucion mas rapido posibel pa Air Aruba y esaki mester worde haci cu un caracter di urgencia grandi.

E comunicado ta bisa lo siguiente: "Recientemente gremionan di sector priva a worde informa door di representantenan di Air Aruba di e situacion financiero critico den cual e compania ta pasando aden al momento.

E gravedad di e situacion aki

ta tal cu no por descarta un posibel bancarota di Air Aruba NV si no haya un solucion pronto y definitivo.

Hecho ta cu Air Aruba ta trece 26% di tur pasahero pa Aruba y cu discontinuacion di su operacion lo tin un impacto desastroso riba nos industria turistico y economia en general.

Mirando e consecuencianan serio aki e organizacionnan AHATA, ARMA ATIA, SNBA, SDU, FTA y Camara di Comercio a manda pidi parlamento den un carta fecha 20 di januari ultimo pa tuma accion inmediatamente.

Den tal carta e gremionan menciona ta propone na Parlamento pa instrui gobierno pa duna un garantia di US 10 Milyon pa sigura continuacion di operacion di Air Aruba bao condicion cu ta sigui traha riba (re) privatizacion di e compania.

E inyeccion aki ta rekeri pa e compania por sigui cumpli cu su debenan mas bieu cu 30 dia.

E representantenan di sector priva alavez ta di opinion cu mester sigui negocia cu tur dos candidato cu a mustra interres pa tuma e compania over, tanto e grupo KLM /

Martin Air como Mercury Air Group.

Ademas e organizacionnan a solicita Parlamento un reunion cu caracter di urgencia pa haya un update riba e ultimo desaroyonan incluso e posicion cu Parlamento tin y pa ofrece nos ayudo y sosten.

Actonan sospechoso lo ta pasando den un casino local

ORANJESTAD (AAN): Ultimo dianan DIARIO ta cuminsa nota cu reclamonan ta drentando encunto 'actonan sospechoso' cu lo ta tumando lugar atrobe den un Casino local, y cu tin trahadornan tiki disgusta.

A ser splica, cu den un Casino situa den un High-rise Hotel tin cosnan straño ta pasando, y ta parece comosifuera cu gerencia lo no ta anotando tur Dollar cu clientenan ta cumpra eyden, pa asina e instancianan involucra (e.o.

Belasting) no haya sa cu exactitud nan ganashi.

Den pasado ta masha hopi biaha caba, e tipo di noticianan aki a drenta den circulacion, unda trahadornan na otro Casino ta mustra cu anochi ora nan bay cas nan ta mira cierto cantidad di suma di Dollar poni den e "Progressive Jackpot" di Caribbean Stud Poker, y ora nan yega mainta nan ta ripara cu e suma aki a reduci misteriosamente.

Net awor, cu bista di Aruba ta dirigi grandemente riba e

asunto di extradicion unda nan kier extradita 5 Arubiano, e trahadornan di Casino ta mira con gerencia Mericano ta haci y deshaci cu placa eyden.

Nan ta suplica pa Gobierno y e instancianan concerni, haci un investigacion pa check si acaso ta Labamento di Placa ta tumando lugar, of ta hortamento di placa.

Pa colmo, tin indicacion cu e.o. e Supervisor trahando na e Casino ey mes, no mag di sa cuanto ta worde cambia, etc.

Douane lo haya cacho Hulandes

ORANJESTAD (AAN): Tur cos ta mustra cue dianan aki, dos funcionario Hulandes lo a yega Aruba pa un bishita importante!

E bishita, segun informe, lo ta pa sondea e posibilidad relaciona cu un of mas cacho specializa, cu Hulanda supuestamente lo regala e cuerpo. Parece cu lo ta trata di cachonan entrena especialmente pa intercepta droga.

Si e informe cu DIARIO ta dispone di dje y cu ta indica cu Hulanda lo bay regala cachonan special, ta positivo e ora por bisa cu porfin nan wowo a habri y a cuminsa haci algo pa nan mes beneficio.

Manera ta conoci cu Aruba den pasado a haya cachonan entrena for di entree otro Venezuela, Merca y hasta Inglaterra. For di Madre Patria, parece cu nan lo tin intencion pa regala, posiblemente bendi via di KABNA e cachonan. E cachonan cu actualmente ta den servicio ta birando 'bieu', apesar segun informe nan ta den bon condicion.

Tempo pa cuminsa reemplaza nan ta yegando! Posiblemente lo a hiba combersacion pa pidi Hulanda un of mas cacho, y pesey e dos funcionarionan lo ta di bishita na despacho di Douane.

Casi sigur lo tin di bay manda personal pa entrena cu e cachonan aki na Hulanda pa un tempo.

Mientras tanto basta aña atras Polis a worde priminti

algun cacho. Ministronan a baha y subi y te awe ningun cacho cuerpo Policial no a mira. Tin polis a expresa cu "Dios sa con lo para cu e cachonan ya cu ni lapi of bateria nan no por cumpra, corda pa mantene e cacho."

NO LAGE CAY!!!

